

From: "Lo Chun-man,Oscar" [REDACTED]
To: panel_e@legco.gov.hk

Date: Tuesday, January 03, 2017 01:05PM
Subject: Fwd: 防止學生自殺公聽會講稿--陸蔭明

秘書處同事:

你好,這是7/1 教育事防委員會 就[防止學童自殺委員會最終報告]的建議提交意見書 公聽會 陸蔭明的意見書.
感謝幫助!

內容:

對於委員會既報告,真係有D不以為然。

成份報告好明顯睇到,係好想避開教育制度問題係自殺既主要成因呢個事實,但結果兜兜轉轉,都係冇辦法避開,最後就出現"教育系統所造成既學習壓力同自殺冇明顯直接關連"既結論。但同時,又有要改善教育制度建議呢D咁奇怪既結果。

我係同意報告話自殺既成因好多時唔係單一因素,就正如報告所講既4項危險因素--精神健康、心理因素、關係問題同適應困難,好多時都唔會因為只有其中一個因素就會導致自殺,但我想講,呢D問題既源頭係乜?點解會有呢D因素?

報告冇深入去講,但我可以講,呢4項因素都可以係同一源頭,就係有問題既教育制度。

一個表面上話係多元學習,但實際上係以應試為目標既教育制度,好自然就會做成報告所講既危險因素。

舉例一個長期要面對各樣頻繁測驗考默,家課量又超多既學生,出現精神健康問題可以話係"好正常",精神健康出左問題,心理又點會好?再加上已經將所有時間都用晒去應付學業,咁仲邊有時間去同人建立關係,人際關係肯定唔好,最後仲要再加上學既野根本就超越晒佢年齡可以應付既範圍;例如K2已經有幼稚園有記憶遊戲--即係默書,咁適應冇問題先出奇。

現行既教育制度肯定係自殺既成因之一,無論份報告點樣玩語言偽術,結果都係冇辦法幫佢"洗底",而當中TSA就係加劇成個問題既主要元凶之一,因為TSA就係成個應試教學既添加劑。

一個小三要考既試,由小一就開始操練,其實正確應該係話幼稚園已經開始。

試諗下小一就要操小三既試,咁幼稚園唔學早D學快D到小一又點應付?

而操練方面,就有明操--做寫到明係TSA既練習;亦有暗操--將正常既教學改到貼近、甚至同TSA既內容同考題方式一致,等你操左都唔知,但代價就係好多應該同需要教既野就放棄左。

可以話,成個教育係比TSA帶住走,TSA點考,學校就點教,深有深操,淺有淺操,總之就係要操。分別操多定操少、明操、暗操定明加暗咁操。

最後,我嚟呢道想同委員會講一句,真係要減少自殺,真係要改善教育制度,係要由取消TSA開始。

----- 轉寄的郵件 -----